

Alpinissem – hotellaria – viafier – turissem

«Cuntrasts» da la Televisiun Rumantscha sin DVD, part 9

Il clom da la pizza – 150 onns Club alpin svizzer

Sin il Pez Russein, meglier enconuscent sut il num Tödi, duess Rudolf Theodor Simler da Wollishofen/Turigt avair gi l'idea da fundar il Club alpin svizzer (CAS). Ils 19 d'avrigl 1863 vegn quest club fundà ad Olten ed il medem onn vegn mess il crap da fundament per la «Grünhornhütte» al pe dal Tödi – la mamma da tut las 152 chamonas dal CAS. Oz, 150 onns suenter sia fundaziun, è il CAS in'istituziun naziunala cun 140 000 commembers ed en il turissem omniprescent. En ina documentaziun filmada – cun scenas giugadas e material istoric – raquinta l'autur Gieri Venzin l'istorgia da la conquista da las Alps. El mussa tge rolla ch'il CAS ha giugà en quella. Ed el dumonda, or da tge ch'il renumà clom da la pizza consista atgnamain. (Emissiun dals 14 d'avrigl 2013, redacziun: Gieri Venzin).

Da Tujetsch a Tarasp – in viadi en l'istorgia da tschintg hotels en il Grischun

D'ina collega survegna jau in guid da hotels dal 1924. Qua vegnan descritti hotels che jau n'hai mai vis, e da quels che jau n'hai mai udi insatge. Hotels ch'èn svanids – e da quels ch'i dat



anc oz. Las descripsiuns cutizian mias mirveglias – curt e bun: jau vom en viadi da hotel a hotel, da regiun tar regiun. Co sa preschentan quests hotels oz – e co eran quels avant 90 onns? (Emissiun dals 14 da december 2014, redacziun: Eligi Derungs).

«Paun jester ha siat crustas»

«Paun jester ha siat crustas», di il proverb sursilvan, ed uschia ha er num il film che Christian Schocher ha realisà per la Televisiun Rumantscha il 1998. Igl è l'istorgia da dunnas ed umens da la Surselva e dal Grischun Central ch'èn ids la fin dals onns 1960 per ils gronds hotels en l'Engiadina sco camarieras e chas-seurs, sco mattas da chombra e portiers. L'ultima generaziun da quels stagiunaris era gia il 1998 magari veglia, uschia ch'igl è stà bun che Christian Schocher ha laschà raquintar els e lur patrums da quel chapitel pauc enconuscent da l'istorgia da l'economia grischuna. («Sas anc?», emissiun dals 3 d'avust 2014, redacziun: Christian Schocher).

Ils pioniers da la viafier en il Grischun

L'Ollandais Willem Jan Holsboer (1834–1898) ha gi l'idea, l'inschigner Achilles Schucan (1844–1927) ha realisà ella ed il sindacalist Wilhelm Hew

(1865–1938) e ses collegas han gidà cun lur engaschament quotidian che la viafier è daventada er en il Grischun in'istorgia da success. Els trais èn sperblers auters pioniers da l'emprima viafier a binaris stretgs en il Grischun, inaugurada ils 9 d'october 1889 tranter Landquart e Claustra. «Ils pioniers da la viafier en il Grischun» sa numna il film documentar che Ruedi Bruderer ha realisà per il giubileum da 125 onns Viafier Retica. En il film vegnan a pled descendents da quests pioniers e mussà lieus ed eveniments impurtants en l'istorgia dals emprims onns da la Viafier Retica. (Emissiun dal prim da zercladur 2014, redacziun: Ruedi Bruderer).

Strapatschs al Bernina


Avant 100 onns, ils 5 da fanadur 1910, è arrivà l'emprim tren direct da San Murezzan a Tirano. Questa viafier tranter l'Engiadina e la Vuclina è l'emprima ed anc oz l'unica che collia duas valladas alpinas en direziun nord – sid cun ir sur il pass ora, tut las autras fan quai cun in tunnel. Il film «Strapatschs al Bernina» sa fatschenta cun l'istorgia da la lavur d'enviern ed ils ristgs che quella enserra anc oz per ils lavurers da la viafier. Ruedi Bruderer è stà quest enviern sin il Bernina e mussa a l'exempel da quatter generaziuns da la famiglia Beti co che questa lavur è sa midada en il decurs dals onns. (Emissiun dals 20 da zercladur 2010, redacziun: Ruedi Bruderer; er cumpari en vendita).

«Noss tren» – 100 onns viafier en Surselva

La Surselva ha stuì spetgar ditg fin che la viafier ha tschivlà lung il Rain. L'emprim han las discussiuns infinitas davart la lingia retardà il project. Suenter la decisiun da passar a Glion tras la Ruinaulta enstagl sur Flem mancavan il 1903 ils daners per finanziar la lingia enfin Mustér. Il film «noss tren» è in viadi la damaun marvegli da Mustér a Glion. Nus interrumpain il viadi en lieus interessants e dain er sguards en l'istorgia da quests 100 onns viafier en Surselva. Nus laschain reviver la viafier sco tren dals indigens e da l'economia locala, mussain co ch'ins ha fabricgà il 1912 quest trajet da viafier cun meds simpels e co che la natira è adina puspè in factur incalculabel. Passagiers e passegieras raquintan da lur relaziun cun il tren. Il film «noss tren» è in omagi a quels che s'engaschan l'entir onn per la viafier e per quels che van di per di cun il tren. (Emissiun dals 26 d'avust 2012, redacziun: Ruedi Bruderer e Roman Meyer).

«Il tren da la speranza». 100 onns Bever – Scuol

L'entschatta dal 20avel tschientaner è stà



Hotel Schatzalp, Tavau.

FOTO: JARIT / CC BY-SA 3.0

il temp da las grondas visiuns da viafier. Uschia siemiava l'Engiadina ch'in bel di passavan tras la val trens internaziunals da Minca a Milaun. Avant 100 onns era collià l'arriv dal tren cun grondas speranzas, a la gronda festa d'inauguraziun la fin da zercladur 1913 a Scuol eran preschents betg main che trais cussegliers federali. Pervi da l'entschatta da l'Emprima Guerra mundiala l'onn 1914 è la cuntinuaziun dal tren en direziun dal Tirolo e da la Bregaglia però restada in siemi. La staziun da Scuol è dapi quella giada ina staziun a chau, cumbain ch'arrivan dapi il 1999 tras il Veraina er trens directs da Cuira en la chapitala da l'Engiadina Bassa. En il film «Il tren da la speranza» raquinta Ruedi Bruderer durant in viadi da Bever a Scuol cun numerus documents, films e fotografias originalas, l'istorgia da quests 100 onns viafier en l'Engiadina. (Emissiun dals 23 da zercladur 2013, redacziun: Ruedi Bruderer).

Hotels – istorgias, patratgs e pensiers

En il Grischun ha la hotellaria per propi cumenzà davent dals 1880. Ils blers hotels gronds da la «belle epoque» èn ve-

gnids bajegiads da lura davent. Suandads èn lura blers, ed els han gi buns temps. Ma ils temps èn sa midads. Eran las Alps durant onns e decennis praticamain la suletta destinaziun da vacanzas l'enviern, è quai oz auter. Faschevan ils giasts ina giada trais fin quatter emnas vacanzas, èn quai oz paucs dis. Medemamain ha la parahotellaria prendi davent blers giasts als hotels. In grev temp per ils hotels e per hoteliers. En il film «Hotels – istorgias, patratgs e pensiers» fa Gion Tschuor ina tura d'orizont da la hotellaria d'antruras fin als problems dad oz. (Emissiun dals 18 da mars 2012, redacziun: Gion Tschuor).

Novitads da la rusna – da miraglia, concurs e siemis

L'hotel Palace a Scuol è bandunà dapi quatter onns. L'emprim hotel da luxus da l'Engiadina Bassa ha in passà mumentà. Mo durant ils ultims quatter onns hai dà set ingiants. L'hotel è ina perditga da l'istorgia pompusa dal turissem da sanadad. En il 19avel tschientaner – cur ch'i na deva ni la Viafier Retica ni il traffic d'autos – frequentavan chaus curunads e famiglias ritgas da tut l'Europa il «Kurhaus Tarasp» da lezza giada per curar qua, grazia a las funtaunas curativas, mendas da tuttas sorts. Oz appartegna la chasa ad ina gruppa israelian-americana d'investurs ch'ha gia cumenzà cun las renovaziuns las pli urgentas. Ma l'avegnir da l'hotel è intschert: in object da speculaziun u in object istoric prezius? (Emissiun dals 14 da settember 2014, redacziun: Christoph Müller).

Muntogna magica – la strategia dal Center da sandà Engiadina Bassa

Dunna Olga da Ftan ha rut in bratsch. Sch'i na dess betg l'ospital regiunal a Scuol avess ella stuì far in detg viadi per sa laschar tractar. Entant ch'auters ospitals pitschens cumbattan per surviver, è il futur da l'Ospital Engiadina Bassa garantì. Collavurar empè da concurrenzar è la furmla magica. Cun la decisiun strategica d'unir l'Ospital Engiadina Bassa cun il Bogn Engiadina ed ils servetschs da tgira è vegnì creà il Center da sandà Engiadina Bassa. Quai ha salvà l'ospital

e cun el il provediment da sanadad en ina regiun periferica. E cun servetschs da nischa vegn creà e promovì il turissem da sanadad. Quel confinanziescha las spiertas dal CSEB che vegnan meglieradas e cumpletadas cuntinuadamain. Cun las estructuras novas persvada il CSEB sur ils cunfins dal Grischun e vala per il chantun sco exempel per centers da sanadad futurs. (Emissiun dals 22 da zercladur 2014, redacziun: Susanna Fanzun).

Dal Magic Wood a l'Action Wood

Enturn l'onn 2000 scuvra in raivider austriac ils blocs da gnais en il guaud a l'entschatta da la Val Ferrera. El schubregia quels cun amis ed els chattan tschients da lingias da bouldrar (raiver senza suga). Da lez temp las pli grevas sin l'entir mund. Magic Wood – sco ch'èls numnan lur paradìs – daventa in dals pli enconuscents lieus da bouldrar insumma. Cun la popularitad vegnan er ils problems cun ils indigens. Il film «Dal Magic Wood a l'Action Wood» mussa la fascinaziun da bouldrar e tge ch'ins ha stuì far per evitar che Magic Wood vegnia serrà. (Emissiun dals 2 da november 2014, redacziun: Petra Rothmund).

In di en l'Arena alva

Martin Capeder prepara las pistas la damaun a las tschintg. Arthur Capaul vegn a las 6.30 e chargia la rauba. Tanja Cadruvi beneventa si'equipa a las nov. Questas trais persunas lavuran tar l'Arena alva. L'Arena alva è il pli grond patrun en Surselva. Da stagiun auta lavuran milli persunas per il bainstar dal giast. Questa reportascha mussa tge che vegn tut fatg en quest territori da skis durant in di. (Emissiun dals 27 da favrer 2011, redacziun: Petra Rothmund).

«Dick und Doof» da l'Engiadin'Ota – e lur ultima stagiun

En il vitg numn'ins els «Dick und Doof». En sasez han els però num Marti Laudenbacher e Rudolf Büsch. Gia dapi 15 onns èn els dus responsabels per il runal da skis Mùsella a La Punt-Chamues-ch en l'Engiadin'Ota. Quest runal da skis, al qual er Sandro Viletta, il campion olimpic, ha emprendì dad ir cun skis. A l'ur dal travasch e da la high society passentan els lur mingadi senza gronda agitaziun. Ils dus Engiadinais originals na sa laschan betg disturbar da nagin e nagut e schlian lur sfidas quotidianas sin lur atgna via. (Emissiun dals 2 da mars 2014, redacziun: Carin Camathias).

Turissem en las Alps – er en l'avegnir?

Vacanzas – per blers il pli bel temp da l'onn. In dals emprims patratgs tar ils blers: Nua giain nus en vacanzas? Ils turisticers tschentan u ston tschentar quella dumonda betg mo per in onn, mabain a lunga vista. Quai avain er nus fatg. Co e nua vegni fatg vacanzas l'onn 2050? Giain nus sco uss sper la mar? Vegnan quels da la Bassa e da las citads anc tar nus en la muntogna – sco uss? Sa semtgan noss turisticers avunda per l'avegnir? Cun questas ed autras dumondas confrunta l'autur dal film glieud dal fatg. (Emissiun dals 21 da november 2010, redacziun: Gion Tschuor).

La preschentaaziun:

«Cuntrasts» da la Televisiun Rumantscha: Films emess ils onns 2007–2015, accessibels en la Biblioteca chantunala en format DVD.

Dapli infurmaziuns:

chatta.ch/?hiid=4733
www.chatta.ch



Rumir naiv a la staziun Bernina Suot (1967).

FOTO: HEINZ BAUMANN / CC BY-SA 4.0